

CONGREGATIO PRO CAUSIS SANCTORUM

---

DECRETUM

ROMANA seu KAUNEN.

CANONIZATIONIS

VEN. SERVI DEI

**Georgii Matulaitis seu Matulewicz**

ARCHIEPISCOPI TIT. ADULITANI

REFORMATORIS

CONGREGATIONIS CLERICORUM REGULARIUM MARIANORUM

SUB TITULO IMMACULATAE CONCEPTIONIS B. M. V.

FUNDATORIS

CONGREGATIONUM SORORUM AB IMMACULATA CONCEPTIONE B. M. V.

ET

ANCILLARUM IESU IN EUCHARISTIA

---

SUPER DUBIO

*An et de quo miraculo constet, in casu et ad effectum de quo agitur.*

Venerabilem Servum Dei Georgium Matulaitis Matulewicz ortu et natione Lituanum, anno 1871 natum vitaeque functum anno 1927, munera vicarii paroecialis, deinde magistri in Seminario Kielcensi, postea in Academia Ecclesiastica Petropolitana (in Russia), Episcopi Vilmensis et demum Visitatoris Apostolici in Lituania, necnon Reformatoris Clericorum Regularium Marianorum et Fundatoris duarum Congregationum Sororum egregie explevisse heroicasque exercuisse

virtutes christianas constat ex Decreto Apostolicae Sedis die 11 mensis Maii a. 1982 edito.

Ut autem eidem Venerabili honores decernerentur Beatorum Caelitum, Causae actores exhibuerunt, ad iuris normam, miram quandam sanationem a Deo per ipsius Venerabilis intercessionem patratam. Quae quidem mirabilis sanatio contigit dominae Adelaidi Tamošiūnaitė, in Lituania ludimagistrae octoginta annos natae. Ipsa namque ad caeleste recurrens patrocinium praedicti Venerabilis, in instanti pleneque convaluit anno 1974 a trombophlebitide ex venis varicosis sinistri artus inferioris.

Super huiusmodi miranda sanatio confici haud potuerunt praescriptae canonicae inquisitiones, propter peculiaria in supplici libello exposita adiuncta. Quamobrem, instante hodierno Administratore Apostolico Kaunen. et Vilkaviskien. atque Praeside Conferentiae Episcoporum Lituaniae, Summus Pontifex Ioannes Paulus II benigne dispensavit ab instruendo apostolico processu super praedicta sanatione ita, ut ad effectum de quo agitur sufficerent depositiones quorundam testium scripto datae et iuramento confirmatae. Quibus depositionibus una cum iudiciis legalibus duorum ex officio deputatorum Peritorum confecta est *Positio* super miraculo, quaeque subiecta fuit studio Consultae Medicorum penes nostram Congregationem exstantis, die quidem 15 mensis Ianuarii anno 1986 coadunatae. Sodales autem eiusdem Consultae, re mature perpensa, censuerunt agi de instantanea perfectaue sanatione, quae per naturae leges et scientiam medicam explicari nequit.

Quam opinionem medicorum secuta est disceptatio theologica, et primum quidem, die 9 mensis Maii a. 1986, in Peculiari Congressu Consultorum, moderante Fidei Promotore Generali; ac deinde, die 17 subsequentis mensis Iunii, in Ordinaria Congregatione Cardinalium et Episcoporum, ponente Em.mo Cardinali Aloisio Ciappi, in Palatio Apostolico Vaticano coacta. Et cum Rev.mi Consultores tum Em.mi ac Rev.mi Patres Cardinales et Episcopi, qui aderant, proposito dubio: *An et de quo miraculo constet, in casu et ad effectum de quo agitur, adfirmando responderunt.*

De hisce omnibus certior factus per subscriptum Cardinalem Praefectum, Summus Pontifex Ioannes Paulus II, vota Congregationis

pro Causis Sanctorum libenter excipiens, mandavit ut Decretum super praefata sanatione rite appareretur.

Quod cum factum esset, hodierna die, accitis ad se cardinalibus infrascripto et Causae Ponente meque Antistite a Secretis Congregationis ceterisque de more convocandis, eisque astantibus, Beatissimus Pater sollemniter edixit: *Constare de miraculo a Deo patrato per intercessionem Ven. Servi Dei Georgii Matulaitis seu Matulewicz, scilicet de instantanea, perfecta ac stabili sanatione dominae Adelaidis Tamošiūnaitė a trombophlebitide ex venis varicosis sinistri artus inferioris.*

Hoc autem Decretum in vulgus edi et in acta Congregationis pro Causis Sanctorum referri mandavit.

Datum Romae, die 30 mensis Iunii A. D. 1986.

PETRUS Card. PALAZZINI, *Praefectus*

L. ✠ S.

† Traianus Crisan, Archiep. tit. Drivastensis, *a Secretis*